



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma : Tir Yimyim

tiryimyim@aolima

tir yimyim

TAPAK 3

Messi nem L'Equipe-i athlete of the year naroküm agütsü

Sen lakh 50 scheme ajanga shiranger tajangzük mangu: Varun Gandhi

VOL. XX NO. 86 (ADOK 86) DIMAPUR

AMUNGNÜ (SUNDAY)

ANEJETI (JANUARY) 08, 2023

₹ 5.00

## Taoba NLA Speaker Dr Imtiwapang den tanü 'state funeral' agitsü



Dr. Imtiwapang Aier

Dimapur, January 7, 2023 (TYO):

Taoba Nagaland Legislative Assembly Speaker aser MLA Dr. Imtiwapang Aier mapang tatsüka temang manem aruba sülen tanep arishi tembango. Pa arishi küm 50 liasü.

Dr. Imtiwapang-i Honibarne pa kinungtsü, jala pezü aser jabaso ka toktsür alima nungi pilaa ao.

Pa indang mang Kohima-i bener atutsü aser idakji Deobarnü state funeral agiba sülen par tasoyim Süngratsü nung mang aremtsü.

2013 küm Dr Imtiwapang-i 23 Impur Assembly constituency

nung Congress ticket amer takok angu aser iba sülen pai Naga People's Front (NPF) nung aden aser Geology and Mining indang Parliamentary Secretary inyak.

2016 küm 12 buba Nagaland Legislative Assembly nunga pai Speaker inyaka liasü.

2018 nung pai NPF candidate ka ama toktepa takok angu aser 2022 nung pa den NPF MLA 20 tashi Nationalist Democratic Progressive Party (NDPP) den loktep.

January 8 nungongdang 1:00 ako nung Heritage, Old DC Bungalow, Officers Hill, Kohima nung pa den State Funeral agitsü.

Tanü Signal Angami nung Dr Imtiwapang tedi'er kidang Nagaland Chief Minister Neiphu Rio, United Democratic Alliance chairman TR Zeliang, MLA Imkong L Inchen aser tanga lennirtemi asir nem tetushi agütsü.

Dr. Imtiwapang Aier ya Geology nung PhD angur ka liasü aser pai 2013 aser 2018 nung Impur constituency nungi kümsük anaben tashi takok ngur MLA teinyakdak nung alima nungi pila.

## Naga nung lakti tentetemi yimten latettsü akhanger

Dimapur, January 7, 2023 (TYO):

January 6, 2023 nü Union Home Minister Amit Shah-i Nagaland semdangi arudang Nagaland nung tongtipang lakti tentetemi pa nem Naga yimten latettsü nung shidi ka zülüogo.

"Onoki na lisopurtem alidak Nagaland-i aruba pelashishia agizüker. Na ozü limai aruba ya kanga tongtipang anungji iba mapang nü dangi shidi ka zülur" ta Nagaland Peoples Action Committee (NPAC), Nagaland GB Federation (Village Chiefs), Peace Committee, Nagaland GB Federation (Village Chiefs), Against Corruption and Anabated Taxation (ACAUT), Central Nagaland Tribes Council (CNTC), Senior Citizens Association Nagaland (SCAN), Ex-Parliamentarians' Association of Nagaland (EX-PAN), Confederation of Nagaland Chamber of Commerce and Industry (CNCCI) aser Nagaland Tribes Council (NTC) lennirtemi shidi nung shia lir.

"India sorkar aser Naga olemteper telok ana- NSCN-IM aser Working Committee, 7NNPGs tsüingda küm 26 buba jembia arur aser mapang talangka iba onük

metembangba ajanga Nagaland nung alirtem libaliro aser rongsenketzüing nung timtem aika ajurua arur. Iba khuret nung ajemdaker onoki India Prime Minister dang Naga yimten latettsü atema ayongzüka shidi aika zülüogo. October, 2019 nung olemtep tembangaka tanü tashi kechi ajurutsü'ar memetetba tia ka nung lir" ta parnoki ashi.

Talisa 2018 nung BJP General Secretary In-charge of Nagaland-i "yimten latettsü atema election" ta ayimokja public sünemdaktsü saka ibaji tiyazü tenangzükba ka ama kümogo kechiyong Naga yimten melateti Nagaland Legislative Assembly kümsük tatembangleni arur, ta parnokisa Union Home Minister dang ashi.

"Onoki Prime Minister dangi tatemsabuba züluba shidi ka nü nem agütsür. Onoki democratic maparen nung tamang makar anungji election magidang yimten latettsü akhanger. Naga yimten latetba nung onoki akokba tashi yariteptsü aser India sorkar dang telemtetba ka agia olemtep tembangtsü ayongzüker" ta parnokisa Amit Shah dangi züluba shidi nung shia lir.

## Iconic Events Week atema senden jataper

Dimapur, January 7, 2023 (TYO):

January 17 nungi 23, 2023 tashi Iconic Events Week (Azadi ka Amrit Mahotsav) amongtsü aliba atema Home Department-i seden ka amentsü jataper.

Home Commissioner menden ser sendenji January 9, 2023 anepdang 11:00 ako nungi amentsü.

Iba senden nung Director General of Police, Commissioner & Secretary Tourism, Commissioner & Secretary I&PR, Commissioner

Nagaland, Secretary Art & Culture, Secretary YR&S, Deputy Commissioner Kohima, Commandant 1 Assam Rifles Kohima, Director Tourism, Director Art & Culture, Director I&PR, Director YR&S, Deputy Commissioner Phek (via video conference), Director NEZCC (via video conference) aser ADC Chozuba (via video conference) nung adentsü mepishia metetdaksüogo.

## Congress-i Nagaland nung taruba sorkar akümtsü teimla lir

Kohima, January 7, 2023 (TYO): Nagaland nung tesüiba küm 5 tashi NDPP-BJP ajanga tazüingla sorkar ka yimsü süa arur ta Honibarnü Congress-i metetdaksü.

Taruba elections nung maongka agütsüra Naga yimten latettsü aser Nagaland nung terenlok bener arutsü ta Congress-isa ashi.

Honibarnü Congress Bhavan Kohima nung osangbener den jembidang AICC Secretary i/c Nagaland & Sikkim, Ranajit Mukherjee-i iba osang metetdaksü.

Taruba election nung Congress-i takok angutsü imlar kechiyong tang Nagaland sorkar anema noktaker aika lir, ta pai ashi.

BJP-NDPP sorkari tesüiba küm pungu tsüingda Naga yimten latettsü mapa meinyak aser terenlok kecha maliasü, ta Ranajit Mukherjee-i ashi.

Congress-i Naga yimten tangsa latetnür aser assembly election agitsüsa kümra President K. Therie lenisüba kübok Nagaland Congress-i

takok angutsü, ta paisa metetdaksü.

Nagaland nung alirtemi mapa, industry aser terenlok aginüba Congress-i angashir anungji iba atema manifesto tajung ka renemdar. Nagaland nung BJP aser NDPP anema noktakra telokji onok dang lir, ta Mukherjee-isa ashi.

Congress-i menden 60 prong nung tokteptsü teimlemba lir mali ta osangbeneri asüingdangdang "Congress-i secular alliance ka tentettsü shidangogo. Onoki Nagaland nung Hindutva tashi marudaktsünür" ta pai langzü.

"Tesüiba nung Congress-i election nung tamakok nguogo saka nübortem temlungjang nungbo onok lir aser district ajak nung inyaksangshidar. Tanü Nagaland sorkar melenzüktsüpurji onok dang lir" ta paisa ashi.

Ozü candidate tem rongnung tetsürtem dena lanur aser tain temeyoktep asütsü, ta Mukherjee-isa shisem.

Nagaland Pradesh Congress Committee ketdangpurtemi state ajunga sema candidate tem den ajurutepa senzür, ta paisa

metetdaksü.

Mongulbarnü Nagaland Assembly Elections atema Senior Observer Mukul Wasnik, MP den AICC In-Charge Dr Ajoy Kumar na Dimapur-i arutsü aser iba ya Nagaland Congress party akangshiba mapang ka asütsü. Tena den Nagaland Assembly Elections atema AICC teshimtet telok arutsü.

January 10 nü Working President nungi Secretary tashi NPCC office-bearers, PCC Members, Heads of Departments & Cells, state body of Frontal Organisations, District Presidents aser tongtipang district ketdangpurtem Dimapur-i jaokogo ta Mukherjee-i ashi.

Iba anogo nung NPCC President K Therie menden ser anogo piyong senden amentsü aser idangji AICC lennirtemi tesentepertem den sensaksemtsü, ta paisa ashi.

Tanü osangbener senden nung NPCC working president Khriedi Theünoo aser NPCC general secretary S Supongmeren Jamir na aden.

## JD(U)-i election magidang Naga yimten latettsü akhanger



Honibarnü Hotel Saramati nung Rajya Sabha MP Aneel Prasad Hegde, Janata Dal (United) General Secretary, (North East) Incharge Afaque Ahmad Khan, JDU general secretary Nagaland Kitoho S Rotokha aser party lennirtemi osangbener den jembidang agiba noksa ka angur.

Dimapur, January 7, 2023

(TYO): 2018 election nung 'Election for Solution' ta ser agi anungji election ji mapang shitak nung agitsüla aser aji masüding Naga yimten latettsüla ta Janata Dal (United)-i metetdaksüogo.

Honibarnü Hotel Saramati nung osangbener den jembidang Rajya Sabha MP, Aneel Prasad Hegde-i ashiba agi "Nagaland nung yimtenren tamendakdak mejungi aliba ajanga Naga yimten latettsü makoker ta JD(U)-i bilemer."

Naga yimten latettsüla kechiyong Nagaland nung küm 80 tashi mepetmesü agi sünger aruogo, ta pai ashi.

JD(U)-isa nübortem aser telok balala dang democracy anema inyaktertem nem lenmang lapoktsütsüsa olen mejembitsü mepishi.

"Nagaland nung hopta ishika lir election agitsü lir anungji tensa asadangtsü atema onok aru" ta Janata Dal (United), General Secretary, (North East) Incharge, Afaque Ahmad Khan-ia ashi.

JDU ya democratic socialist party ka lir aser onoki teti Nagaland aser north east state tem renloktsü atema bilemja arur, Onokisa Eastern Nagaland nung terenlok maliba atema süoki ia bilemer, ta paisa ashi.

Janata Dal (United)-i teti tesem ajunga kasa renloktsü atema jembia aser inyaka arur. ENPO-i Nagaland nungi state balaka akümtsü akhangba ajanga Naga kintem longjemba nung timtem bentsür arutsü, ta paisa ashi.

Eastern Nagaland nung nungdakba terenlok mapatem inyaksü atema Centre-i Nagaland nem senotsü peria agütsütsüla, ta Afaque Ahmad Khan-isa metetdaksü.

Tanü senden nung JDU general secretary, Nagaland Kitoho S Rotokha-i "election agira ni Ghaspani -2 Assembly constituency nungi tokteptsü" ta ashi.

## T. John Lkr atema tatembangbuba parade katsüogo



T. John Lkr atema tatembangbuba parade katsüba noksa nung angur.

**Dimapur, Aenjeti/January 7 (TYO):** Mapa toktsüba Director General of Police, Nagaland T. John Longkumer, IPS atema tatembangbuba Parade sentong ka January 7 nü NAPTC, Chumoukedima nung ayongzüka agiogo.

Sentong nung o jembiba mapang Longkumer-i, pa

police officer ka ama inyaka aruba otsü aser tajangshibatem lemsatep aser pa den teka amteper inyakba atema Nagaland Police ajak dang kanga pelaba lemsatepba den Nagaland Police tenzüksü atema maangka anguba atema kanga nema danga bilemba

lemsatepa liasü.

Paisa, Chattisgarh nung mepetmesü adokba mapang pa kübok inyaksangshiba sepai aser officer tem nem aküm tetushi agüja liasü. Maneni pai pa asoshi tatembangbuba Parade sentong ayongzüka katsüba atema kanga pelaba lemsatepa liasü.

## 64buba ZSU General Session agiogo

**Dimapur, Aenjeti/January 7 (TYO):** 64buba Zuketsa Students' Union General Session den repsema tenüngsang agütsüba sentong January 6 nü ZAPO (Zuketsa Area Public Organisation) Ground, Zuketsa jila nung agiogo. Iba sentong ya "Believe and Achieve" omen nung ajemdaker agia liasü.

Iba sentong nung NPCC tir K. Therie o jembir aser Dr. Riku Khutsov, EAC Atoizu, Zunheboto Academic Guest liasü.

Sentong nung o jembiba

mapang K. Therie-i Kuzha Netho Ketshü nung yongtsü nung kati ka taoba züngshiteptsü koda tongtibang iba indang lemsatep.

Kuzha Nu Khru (Kuzhale, Kuzhami Chakhesang dialect) mesüra Khezha nuo Khruo (Tenyidie) koba kilen saru lir, iba ya Kuzha Netho Ketshü nung tetsü tebou temi benshia aruba lir, koba Naga nung ajaki angazüka amshidar.

Therie-isa, Naga nung sovereignty indang jembir aser nüberitem dang tashi aser

rongsen penbuba agi tetsü teboutemi parnok taküm tenla agüja inyakba mamatoktsü ayongzüka. Paisa India nung yimden yimsüsüba nung secularism koda tongtibang iba indang jembir. Pai, India nung nütsüng ishika agi dang amangba tamangba yimsü dak RSS aser Hindutva culture agi koda kongshi iba indang lemsatep.

Maneni sentong nung Riku Khutso, EAC, Atoizu, Zunheboto-i, kaketshirtem dang kaketshisatsü nendaka bushitsü ayongzüka liasü.

## NCC combined training camp Mokokchung nung agidar



NCC combined training camp Fazl Ali College, Mokokchung nung agiba noksa angur.

**Dimapur, Aenjeti/January 7 (TYO):** 25 Naga Bn NCC nung züngoksema aliba school aser college tem nungi NCC Cadets tem atema Combined Annual Training Camp ka January 6 nü nungi tenzüka Fazl Ali College, Mokokchung nung agidar.

Iba camp nung Mokokchung, Mon, Tuensang, Longleng, Shamator, Noklak, Woks, Phek, Peren, Chumoukedima, aser Kiphire nungi cadet 250 shi-i shilem agidar.

Cadet tem adenshiba sülen Covid tashidak tendangerang camp nung shilem agitsü temelaba agüja liasü. Dr. H Tsipongchem Sangtam-i anir Blood Centre, District Hospital, Mokokchung nungi team kati cadet tem blood group tendangtsü aser parnok nem

blood group cards agüja liasü.

Sentong nung okila ya Col CST Swamy, Camp Commandant-i jembia liasü. Paisa, cadet temi anidaktsüba yimayimpongtem aser parnok atema training inyakyim balala renemja alibatem metetdakja liasü. Lt Col Pradosh aser Associate NCC Officers tem aser Permanent Instructor Staff nungeria iba sentong nung shilem agi.

Kasa mapang nung Mokokchung Voluntary Blood Donors Association tir Molodongba-i, azü tenla agütsüba tajangzüka lemsatep. Paisa, temang nung azü talila aliba dang tenla agütsür aser azü tenla agütsüba sülen tetenlar dak kecha timtem matoker ta ashi.

Sentong nungsa Financial Inclusion Division, State Bank of India Mokokchung, Chief Manager Athili-i, cadet tem den financial literacy indang lemsatep aser savings bank account lapokba tajangzüka indang rasa ashi. Savings, investing, internet banking, aser mobile banking indang Chief Manager-isa tatongi rasa ashi. Maneni bank staff temi Atal Pension Yojana aser Atal Bhima Yojana nung amala scheme tem indang metetdaktsü.

Osangbenertem den sensaksembe mapang camp commandant-i, PT, yoga, drill, weapon training, map reading, saisapong amala sentong balala agitsü atema renema aliba indang metetdaktsü. Iba camp ya January 12 nü tashi agitsü.

## Ao Senden, NDPP tir aser Angh-i asükhu lemsatep

**Dimapur, Aenjeti/January 7 (TYO):** Ao Senden-i sangdong ka ajanga, MLA aser taoba Nagaland Legislative Assembly Speaker Dr. Imtiwapang Aier January 7 anepdang asüba osang angazüka aoksaba aser mang ayimba lemsatepogo.

Pa ya lanur ka aser tarutsü atema nükla tajung yur inyakba tetangshi lenir ka liasü aser pai Naga nung ken o bentettsü aser Naga nung ajungkettsü atema inyaka aruogo. Pa asüba ajanga Naga nung yimden yimsüsüba nung tawa ka adokdaktsüogo, koba süngdaktsütsü atema tasak asütsü.

Ao senden-i asür kinungertem den asükhu lemsatep aser mangyim jashi mapang Tsüngremi parnok nem anisüngzüka agüjang ta sarasademtsür. Onoki asür tanüla nem aküm tetushi agütsür aser teti tatem makadak anisüngzükdakjang ta sarasademtsür, ta Ao Senden tir Chubawati Longchar aser Asst.Gen. Secretary Arentemjen Jamir nati külem sangdong ka ajanga metetdaktsü.

Kasa mapang nung NDPP-ia, January 7 anepdang Dimapur nung Dr. Imtiwapang Aier anojungi asüba osang angazüka mang ayimba lemsatepogo.

Asür Dr. Imtiwapang Aier ya Impur constituency nungi Legislative Assembly züngsem ka liasü, shibai Nagaland aser talisa par constituency ajungkettsü atema bendanga agüja inyakogo. Pai kanga nendaka aser bendanga agüja inyakba ajanga Nagaland Legislative Assembly (NLA) nung aser tanga lokti tentet nunga tongtibang mapa aika abentsü atema nonglokja liasü aser pai NLA Speaker mapa dena benogo.

Pa asüba ya par constituency nung aliba nüberitem aser NLA atema dang masü saka Naga nung ajak atema takoksa tulu lir.

NDPP party nung telen balala nung inyaker ajaki asür

kinungertem den asükhu lemsatep. Tulusang Tsüngremi iba mangyim jashi khuret koktettsü atema anisüngzüka agüjang ta sarasademtsür. Asür tanüla teti tatem makadak anisüngzükdakjangma, ta tir Chingwang Konyak-i sangdong ka ajanga lemsatep.

Maneni Nagaland aser Assam Angh Prof. Jagdish Mukhi-ia sangdong ka ajanga 23 Impur AC MLA aser taoba Nagaland Legislative Assembly Speaker Dr. Imtiwapang Aier January 7 nü Dimapur nung asüba osang angazüka temulung koremba lemsatepogo.

Asür Dr. Imtiwapang Aier ya tedangshi lenir ka liasü aser pai nüberitem ajungkettsü atema bendanga agüja inyakogo. Pa asüba ya state nung aliba nüberitem atema takoksa tulu lir. Lenir tajung ka aser statesman ka ama pa mapa tajung ya teti temaba jenjang nung alitsü aser iba ajanga aika ajungmesotsü, ta paisa ashi.

"Nagaland nung aliba nüberitem aser kü tenüng nung ni asür kinungertem den asükhu lemsatep aser Tsüngremi parnok nem anisüngzüka agütsütsü asoshi sarasademtsür," ta paisa ashi.

Ano Advisor Tovihoto-ia Dr. Imtiwapang Aier asüba osang angazüka asükhu lemsatepogo.

Pa educated aser Naga nung lenir tajung ka liasü aser pai nüberitem tejangraba tulu nung bendanga agüja tenzüko. Pai par constituency aser state nung aliba nüberitem ajungkettsü atema inyakba tenüng asadangtsü langa lir. Pa asüba ajanga Naga nung lokti nung tawa tulu ka adokdaktsüogo, koba süngdaktsütsü tasak asütsü, ta pai ashi.

Ni asür kinungertem den asükhu lemsatep aser iba mangyim jashi koktettsü atema tashi agüjang ta sarasademtsür. Pa tanüla teti tatem makadak anisüngzükdakjang, ta Advisor-isa kasa sangdong ajanga lemsatep.

## 47buba VK Range Students' Union General Conference mungogo

**Dimapur, Aenjeti/January 7 (TYO):** 47buba VK Range Students' Union, General Conference sobaliba sentong nung Advisor of NSDMA & CAWD Kazheto Kinimi alakteta jaoker liasü. Iba sentong ya Zunheboto district kübok Satsami yimtsüng nung January 6 nü agia liasü.

O jembiba mapang Kinimi-i, Sumi nung sobaliba aser libaliro koda tongtibang iba indang lemsatep. Pai, kaketshirtem dang pei sobaliba maneni tejakdangi bener aotsü ajungshi, kechiyong sobaliba ya pei maitsü lir, ta ashi. Paisa, kaketshirtem dang tarutsü tajungba ka asoshi bendanga

agüja meranga inyaktüsü ajungshia liasü.

Iba sobaliba sentong nung ADC Akuluto, sorkar ketdangsurtem aser yimtsüng balala nungi delegate temi shilem agia liasü.

Iba conference lapokba sentong nung School Education, and SCERT Advisor KT Sukhalu alakteta jaoker liasü. Conference mapang siasapong, sobaliba aser literary tetoktepba balala ayongzüka agitsü. Iba sentong nung Rev. Vikuti Kinimi, Asukhuto Prayer Centre, aser Dr. Hotokhu Chushi, retd. Director, Health and Family Welfare na tongti o jembir asütsü.

# Joshimath nung ali anenoka aiba kuli bushidar: CM Dhama



Uttarakhand kübok Joshimath jila nung ali anenoka aiba aser ki kaksaba noksa nung angur.

**Joshimath, January 07 (Agencies):** Honibarnü Uttarakhand Chief Minister, Pushkar Singh Dhama-i, Joshimath jila nung ali telungi anenoka aiba kuli scientist temi bushidar, ta metetdaksüba den külemi, nüburtem aienshidakja taküm kümzüksüji tongtibangtiba, ta ashi.

Honibarnü Dhama-i Joshimath jila semdanga ali anenoka aiba aser kiojen den gari lenmangtem kaksaba repranga asadangogo.

Chief minister-isa pei ki toktür jenshia aliba kibongtem ajurua jembio.

Joshimath kübok Marwari area aser Narasingh tekülem ki sendangba sülen osangbener den jembidang Dhama-i, "Ki jaratem kaksabaji tzu akongba agi lir. Onok asoshi tongtibangtibaji nisung ajak kümzüka tangaleni anir aotsü lir," ta ashi.

"Guwahati institute aser IIT Roorkee ama institution balala nungi Geo-scientist tem aser mongintemi ali anenoka aiba kuli jangjatsü atema bushisüngdangdar. Onoki ISRO (Indian Space Research Organisation) den-a jembidar. Iba tesem nungi nüburtem aienshidaktsütsü aser teyari agütsütsü atema onoki shisadangdar. Parnok jenokdatsütsü atema tesem-a bushidar. Tang ya asüka mongpu lir anungji item tebilemsü atema kanga rongdak süa inyaktsü nungdak," ta Chief Minister-i metetdaksü.

Hokolbarnü Chief Minister-i lendong aliba tesemtem nungi nisungtem aienshidaktsütsü tuyuba den külemi nisungtem jenokdaksütsü atema rehabilitation centres amenoktsü tuyua liasü.

CM-isa ketdangsertem dang disaster department nem iba osang metetdakjang aser tekaraba nung Joshimath nung disaster control room amenokang, ta tuyuogo.

Tawa Joshimath jila nung ki aika kaksadar, ali anenoka air aser Joshimath-Malari border road nunga lenmang kaksaa anentsüh alur. Anentsüh aluba ajanga India-China arrtsü sendakteper.

Brihostibarnep Joshimath nung alirtemi Badrinath Highway nokdang longkak aita sorkar aser administration dang iba tebilemsü onük ya süoki ia agitsüla, ta takhangba agüja liasü.

Sorkari mepishiba nung ajemdaker National Disaster Response Force team aika Joshimath-i yoka lir, ta Chamoli Chief Development Officer (CDO), Lalit Narayan Mishra-i metetdaksü.

# Sen lakh 50 scheme ajanga shiranger tajangzük mangu: Varun Gandhi

**New Delhi, January 07 (Agencies):** Tashidak khenyongi balaka agi shirangertem sen lakh 50 agi yaritsü atema tenzüka health ministry scheme ajanga shiranger shinga tajangzük mangu, ta Honibarnü BJP MP, Varun Gandhi-i metetdaksü.

Ibaji ajanga shiranger 432 taküm lendongi yoker; parnok teimbaka arrshi küm 6 ser tekübokpurtem lir, ta BJP lenirisa metetdaksü.

Treatment atadang tanur 10 bo süadokogo, ta pai twitter ajanga metetdakja Union Health Minister, Mansukh Mandaviya dang tekaraba nung item senotsü agüjang, ta mepishi.

Mandaviya dang shidi ka ajanga Varun Gandhi-i, 'National Policy for Rare Diseases, 2021' scheme ya 2021 küm March 30 nü Ministry of Health & Family Welfare-i tenzüka liasü; iba ya khenyongi tashidak balaka agi shirangertem kümzüksü atema tenzüka, ta ashi.

2022 küm May ita nung iba scheme yanglushia tashidak khenyongi balaka agi shirangertem treatment agitsü atema teyari sen lakh 50 agütsütsü nangzük, ta pai ashi.

Ajisüaka iba sangdong agütsüba sülen ita aika süiaka iba scheme ajanga shiranger ka danga tajangzük mangu, aser

ibaji ajanga shiranger 432 taküm mekümzüksüsa lir, parnok teimbaka arrshi küm 6 ser tekübokpurtem lir, ta BJP MP-isa metetdaksü.

Item tanur aika Lysosomal Storage Disorders (LSD) agi shiranger, item rongnung gaucher, pompe, MPS I, MPS II aser fabry tashidak densema lir, ta pai ashi.

"Treatment atadang tanur 10 bo süadokogo. Anungji ni tanur 208 ji tangsa Centres of Excellence nung treatment tenzüksü mepishir. Nai iba temepishiba süoki ia agitsü ni imlar, kechiyong treatment menora ano tanur aika süadoktsü," ta pai mepishi.

# India-i 'Voice of Global South' nung adentsü atema linük 120 jaok

**New Delhi, January 07 (Agencies):** Ukraine nung rara ajanga alima terenlokdak kongshiba mapang ka nung taruba hopta India-i 'Voice of the Global South' senden ayongzüka akatsü, aser iba senden nung adentsü atema linük 120 dak tema jaokogo.

January 12-13 anogotem nung iba senden ya 'Unity of Voice, Unity of Purpose' omen nung ajemdaker akatsü.

Indian Foreign secretary, Vinay Kwatra-i, Ato kilonser Narendra Modi mangdang 'Sabka Saath, Sabka Vikas, Sabka Vishwas & Sabka Prayas' nung ajemdaker tang mezüng iba ama senden ya akatsü, ta metetdaksü.

Iba senden nungji Bangladesh Ato kilonser Sheikh Hasina, Sri Lanka Tir, Ranil Wickremesinghe, ASEAN aser Africa nungi lenirtem aser alima nung lenir 20 shii shilem agitsü.

Iba senden ya Global South nung aliba linüktem

longjemdaksütsü aser sabang ka nung pei tebilemba balala lemsateptsü nükjidong nung ayongzük, ta Vinay-i metetdaksü.

Iba senden nung adentsü atema Pakistan, Ukraine aser China linüktema jaoker asü mejaokar sorkari metetdaksütsü.

Iba senden nungji climate change, energy aser chiyungtsü agi anungba onüktem jembiba den külemi terenlokdak linüktem nung sentsüh bendenlokba tebilemsüa süoka jembitsü.

Osangbenertem den jembidang Vinay Kwatra-i, alima sabang aika nung terenlokdak linüktem tebilemsü atema mejembir, anungji iba senden nung item onük jembitsü, ta metetdaksü.

'Voice of the Global South' senden 10 lemsar agitsü; senden pezü January 12 nü agitsü aser senden trok January 13 nü agitsü.



January 07, 2022 anepdang Srinagar nung aliba Dal awatsüng nung tzu-ma rürjep kümer aliba noksa nung angur.

# Yaküm India nung tzu-mopung lendong nung nisung 2,227 asü

**New Delhi, January 07 (Agencies):** 2020 küm India nung tzu-mopung dak sendakba lendong balala nung nisung 2,227 süogo.

India nung 1901 küm nungi tenzüka tang tashi nung 2022 küm ya tatsüktiba kümtem rongnung jenjang 5buba liasü, ta Hokolbarnü India Meteorological Department (IMD)-i 'Climate of India During 2022' report ajanga metetdaksü.

2022 küm January aser February na dak alaka tanungba ita 10 bo "above normal" liasü.

Yaküm India nung tsüngmok aser tsüngi lendong nung nisung 1,285 asü (asürtem shilem 58), tüzümsüng lendong nung nisung 835 asü, rürjep lendong nung nisung 37 asü, tali atsükba ajanga nisung 30 asü aser auyi ponga yipru aitba lendong nung nisung 22 asü.

Tsüngmok aser tsüngi lendong ajanga Bihar kija nunga nisung 415 asü, Odisha nung kasa lendong nung nisung 168 asü, Jharkhand nung 122,

Madhya Pradesh nung 116, Uttar Pradesh nung 81, Rajasthan nung 78, Chhattisgarh nung 71, Maharashtra nung 64 aser Assam nung 58 asü.

IMD report ajanga ashiba agi, long-term average (1981-2010) den medemdangra yaküm India nung annual mean land surface air temperature ji 0.51 degree Celsius agi teimba liasü. Yaküm asüka (January-February) mapang mean temperature ji normal liasü saka tanungba ita 10 bo 'above normal' liasü.

Yaküm India nung tzungluruwa mongpu matongdang kanga tatsük liasü; March aser April ita nung anogo 6 dak tali temperature ji 3 degree C- 8 degree C above normal liasü, ta India Meteorological Department report ajangasa metetdaksü.

2022 küm April 29 nü India shilem 70 jungnüa heatwave agi kongshi aser May ita tashi nungbo heatwave jagi India anüdoklen aser tziyümkümlen aliba tesemtem tonga liasü.



January 07, 2022 nü Chhattisgarh kübok Korba nung aliba Indira stadium nung Union Home Minister, Amit Shah election nüboyim sentong ka nung adenba noksa nung angur.



## TIR YIMYIM YIMOBILEM (EDITORIAL)

DIMAPUR AMUNGNÜ, AENJETI (JANUARY) 08, 2022

### Kenyongi tasen akümba

**A**senok ano küm tasen kati aitogo, anungji asenok ajak mulongjang nung asenok taküma tasen kuma melenshir amai bilema alitsü. Aji oda, küm nung anogo ajak rongnung asenok asoshi tongtibangtibaji küm tasen tenzükba anogo January ka nü ya amato bilemer. Ibayongji, iba anogo ya agizüksü asoshibo tarua matatet lenjii oa atar amai December 31 aonungbo amuia mao atar. Ajisüaka, asenoki jungjunga bilemdangra, alima nung December 30 nü aluba anü kasato dang December 31 ka nü lur January ka anepdang adoker, anungji January mezüng adokba anüji kecha balaka masü. Ibajia mangli sangwali asüba tanga anogotem den kasa dang lir. Ajisüaka, alima nung nisungtem timi sobalibaa aotsü asoshi anogo züng tetenzük aser tatembang ka alitsüla, ibayongji ita anü jajaba indang metetter tashitemetettertemi ita anü aser alima alongba indang asadanga ita anogo aser küm lateta yutsüogo. Iba jagi dang, tanü asenok anogo aser mapang sükdanga sentongtem yanglua mapa inyaksü akoker. Ajisüaka, asenok taküm tasen kuma melenshitsüba yabo küm tasen nung ayaokba agi melenshitsü makok. Atangji, küm tenzükba anogo ya tongtibang asüba agi arogoi dena küm tasen sentep sentong ayongzüka amonger. Ano, tesem aika nung küm tasen agizükba sentong December 31 aser January 1 tatentep ayaterem mapang nunga temunungratsüka akar. Item küm tasen sentep nungji asenok aikati taküm tajungba kuma melenshir mapa tajung meranga inyaksü tenangzükba agir. Idangji aikati, peisasa mazüoktetba achiajemba yimya azüoktsü nangzük aser aikati tangar den putepa alitsü peisasa pei mulongjang nung tenangzükba agir. Ajisüaka, küm tasen anepdang nangzükba tenangzükbatem to February ita atongdangbo raksar atonger. Ibaji asenok tamakok masü saka asenoki asen taküm memelenshi ser küm melenba agi asen taküm melenshitsü amai bilemba ajanga lir. Ajisüaka, küm tejen ka süia orr tasen ka aruba nung asen taküm melenshitsüba kecha tashi mali. Aji oda, anogo melenba agi asen taküm melenshitsü asübo January ka anepdang dang masü saka asen taküm ya anepdang shia tajungba-tajungba kuma melenshila. Ajisüaka, asen taküm melenshitsüba yabo asen taküm aser temang yanglusang Tsüngrem tashi agidang melenshitettsü. Ibayongji, tenyar Paul-i 2 Korint 5:17 nung ashir, " Nisung kar Khrista dak lira, paji tasen poktetba." Ano kasa tapu nungji züngdanga ludangra, asenok o asenok na putepa alitsüba yaa küm tasen tenüng nung putepa alitsü nangzüba agi masü saka " Tsüngremi Khrista ajanga asenok Pa den putepdaktsü ama asenoka Yisu ajanga dang kati ka den putepa meimtepa litettsü ta shia aliba asenoki angutsü. Ibajiang, Yisu tesayuba lir ta asenoki Yohan 13:34-35 nung angur. Atangji, kodang asenoki asen taküm indang bilemdanger, shibaibo peisasa pei taküm aser kibong raksanüa ali ? Nisung shiai pei taküm aser kibong akümmketa jangratema linür saka makoker. Aji oda, küm tasen aru shia peisasa pei shi azü, pei tebang temeli aser pei taküm yimya melenshitsü nangzük aser saka memelenshitetter ta kangshiba pur jenti lir. Ibaji asenoki memelenshinüba agi masü aser tajung mekümnüba agia masü saka asenoki Yisu Khristaji asen taküm nung kibur kümdaktsür Pa nem melenshidaktsütsü nangzük masü saka küm tasen aruba tenüng nung nangzükba ajanga lir. Asenok tanü iba yimobilem azüngertem rongnunga küm tasen nung pei taküm tajungba melenshia aotsü asoshi nangzük, mapa kuma meinyaktetba purtem lira, nai shinga taitsü saka Yisu dang nükpoksangi ashi ama, " ni melenshiner, ni taküm tajung lia aoba anogotemji nguner, anungji kü dang aochiang," ta dang shiang. Asen taküm melenshitsü nangzükba anogoji January ka nü ji dang masü, saka koba anogo nung asenoki asen tai ajak , küm tasen tsüngdang masü, Yisu tsüngdang toktsür Pa den alitsü tenzükdir, asen takümji idangjisa tasen kümogoga ta bilemdi, kechiaser Laishibai ashir, " Khrista dak alirtemji kenyongi taküm tasen poktetba lir." Tetezü, tejen otsü to mesüshitsü aser mebiletettsü. Aji oda, tesempatsü temenen mapa jeni inyaker ser nung, itemji Tsüngremi temeim agi, kenyongi meinyak aser mebenshi ama nembangtsütsü ta 1 Peter 4:8 nung ashir. Itemji Khrista dak alirtem dak ataloker.

## OLEMSABANG

### 2023 küm koda lia aotsü sentong renemer ?

~ L. Kika Pongener.

Tamasa Tir Yimyim azünger ajak dang küm tasen salem metetdaktsür. 2022 küm suiteama oadokogo aser küm tasen ka nung ayaokogo. Aji oda, küm tasen ka nung ayaokdang nubur ajunga mulongjang nung 2023 küm ya kechi koma ka asütsü (?)...ta tasüngdangba aika arua alitsü. Atangji nubur aika mulongjang nung 2023 küm yagi ozü kibong, ozü arogo, ozü yimden, ozü lokti aser ozü sorkar asoshi-a kechi ka bentsüa lir (?)...ta asüngdanga alitsü. Kodang asenoki tarutsü nukla mangdang yur inyaka aotsü sentong yangludir, idangji tamasa tesuiba mapang inyaka aruba mapatem khen meyipa repringshitsü kanga tongtipang, aser tamakok kar lira kodaser tamakokji angu (?)...ta bushidangtsü kanga tongtipang lir. Ajiser, takok ngua inyaka aruba kar lira, ano iba nungji ajemdaker tarutsü nung tajungba inyaksü asoshi mangdang tulu ayutsü aser sentong tajung yanglutsü kanga tongtipang lir.

**Kibong :** Asen Naga nunger kibongtem tia repringdangra, kibong aika molumi tia nung lir. Kibong nung apuani tsüngda temeim mekongka akümba, chirnur o tsürabur tsüngda tesendaktep raksar kibong aika aiatai tia nung lir. Tesasatsüka kibong karbo sentsüh agi tsübanger sensak tiai yir ala-ashia alitsü akok. Item teraksa ajak ya kodaser kong nungi tenzük ta teraji jungjunga bushidangra, rongsen timyimi ketdang masüba aser pei kibong jenjang dak alia libaliroba ajanga adokba teimba lir. Kinungbur aika yi lar kümer shiruru tia nung, kinungtsü aser jala-jabaso kong koda alir memeteti taküm lisa-a alir aika lir. Kinungtsür aika pei kibong jenjang memetet, pei kinungbu jenjang memetet 'High Standard' nung apen-suoshi supoba, libaliro 'Life Style' kanga 'Luxurious Life' nung lalushiponga libaliroba agi kibong sentsüh agi tsübanger sensak tiai aiba aika lir. Chirnurtem aika mozular aser yi lar kümer tsürabur timtemdaktsüba, ano aikati pei tsürabur jenjang masadangi senotsü meshiba aser senotsü lalushiponga taküm lisa-a aliba agi kibong sensak tiai yidaktsüba aika lir. Asen Naga lima nung küm ishika lanurtem Drugs achiba otsü/osang tera tajemba kümer tebilemstsü khuret tera tajemba kümer lia aliba, ano tang ya asentenshia Drugs nungja tasen ka 'Sun Flower' achiba osang agi Naga lima ajak ayimsunga kanga bulua jembir/angashir. Ano asenok kibongtem atema iba tongpang ya kanga tesashi ka kümadokogo. Kibongtem atema dang masü saka arogo, yimden aser sorkar atema-a iba ya tebilemstsü khuret tuluka kümadokogo. Yamala külittem ajanga kibong aika molumi tia nung lir. Aji oda, kibong mejungra yimden, arogo aser loktiliba ajak majungtsü. Anungji taküm 2023 küm yabo kibong meyipa repringshiba aser yanglushiba küm ka südaktsüdi.

**Arogo :** Tanü Naga nunger lim arogotem tia repringdangra, arogo aika nung toklang tenzük aser tsüngda kati ka sempatepba, kati ka majinuba, kati ka den tsükchitepba agi sunga lir. Pulpit nungibo mapang shia kati ka den meimtepa, putepa, jungtepa alitsü indang sayutsüngir, saka parnok tsüngda nungbo yamaji malir. Tangar dangbo meshiteta merukteta alitsü, ochishia alitsü indang sayutsüngir, saka parnok libaliroba repringdangra teimba ka memeruk, memeshi, masüngtet, talisa rongsen ketdangsuba nung ochimashi, rongsen nung dang rangloker tenzükba, rongsen ketdangsuba nung teka amuoka amshitsü dang jangraba, rongsen ketdangsuba amshitsü lenmang sadema melira arogo nunga metenzükuba, 'Facilities' peria alidak dang tenzükuba tenzük aser aika lir. Tesasatsüka, tanü lim arogotem aika rongsen ketdangsuba nung ochimashi, lalushipong, chidiyungdiba agi sunga lir. Tanü lim arogotem aika terenlok mapa (Development) nung dang rangloker inyakdang tenyaba mapa (Mission) aser tanela anir aruba mapa (Soul winning) senzüka toktsüba arogo aika lir. Lim arogotem aikati 'Foreign Mission' nung rangloker inyakdang 'Home Mission' tamakok nung lir. Lim arogotem aika nung tenzükertem tsüngda nung tashi raktepba, kibur akümtsü merangtepba, tulu shisangtepba aser tashiyim amshitepba agi sunga lir. Anungji 2023 küm yabo arogo meyipa repringshiba aser yanglushiba küm ka sudaktsüdi.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# Yirusalem nung Khristan cemetery ka nung leper 30 raksatsü



Yirusalem nung mejangjaba nisungtemi raksatsüba Khristan leper noksa nung angur.

**Jerusalem, January 07, 2023 (Agencies):** Yirusalem yimti nung aliba Khristan cemetery ka nung leper 30 dak tema raksatsüba sülen Anglican Arogo, Church of England aser Israeli Ministry of Foreign Affairs-i iba tatalokba aitsüogo. Mount Zion nung aliba Protestant Cemetery ji Yirusalem yimti tejenba anasa lir aser iba cemetery nungji Jerusalem nung Anglican Bishop tanabuba, Samuel Gobat leper densema lir.

Osang angazükba agi, mejangjaba nisung tamajungertemi leper lung teimbaka nungi Kangki indoktsüba den külemi leper lung raksatsü.

Tang tashi nung aibelener shinga mapu, ajisüaka iba ya Yihuda nung kari asütsüa akok ta melung meleme bilemer, kechiyong CCTV noksa nungji tebur anati 'kipahs' (Yihuda nung korang) agir leper rasatsübaji tangoka lir.

Anglican Arogoi, iba ya tamangba yimsü tsütsülen nungi

tesempa agi Khristanem anema inyakba lir, ta shia iba tatalokba aitsüogo.

Osangbener den jembidang Anglican Arogo nung tongti, Hosam Naoum-i, "Item ama tatalokba ajanga iba tesem ya nüburtem tsüngda marezmüktetba mesüra magizüktetba tesem ka lir ta sayur. Taliba sendoker aser bendanger; ibaji ajanga Yisusalem yimti nung onok (Khristanem) kanga timtemer," ta ashi.

Archbishop of Canterbury, Justin Welby-ia, iba tatalokba ya Tsüngrem mezüngmeshiba mapa ka lir, ta shia aitsüogo.

Welby-i sangdong ka ajanga, "Tongti Rabbi aser Yirusalem nung yimsü lenirtem den külemi nia iba tatalokba aitsür aser aibelenertem tekaraba nung aputsü imlar," ta ashi.

Paisa, "Temeshi lima nung yimjung alitsü atema maneni sarasadamba mapang nung tongti putir, Hosam Naoum aser Yirusalem nung Arogo lenirtem den külemi nia Khristanem akhümtsübutsi, kümzüka ayutsü

aser kasa züngshitsü ayongzüker, kechiyong Khristanem ya Arogo indang taküm lung lir," ta metetdaksü.

Welby ya Church of England nung tongti putir lir.

Israeli Ministry of Foreign Affairs-ia nisung kari Yirusalem nung Khristan cemetery raksatsüba tatalokba sashia aitsüogo.

"Iba tatalokba ya yimsü anema lir, anungji aibelenertem pua parnok anema ken o akatsüla," ta Ministry of Foreign Affairs-i twitter ajanga metetdaksü.

Kasa cemetery ya küm 9 tejaklena raksaja liasü.

Commonwealth War Graves Commission (CWGC)-ia, tawa Khristan leper raksatsüba tatalokba ajanga aoksar, ta metetdaksü.

Osangbener den jembidang CWGC otongdar kati, "CWGC leper long kar dang raksatsü. Iba tatalokba bushisüngdangba nung onoki ketdangsertem den amalitepa inyakdar aser staff temi leper yanglushi tenzükgoko," ta metetdaksü.

# ANOGO ABEN TSÜNGREM DEN

## KECHI AGI TAKÜM ALIR?


*Nisung chir, item teret taküm alitsü kokdi ma? (Ezekiel 37:3)*

Iba mangdang nung ya teret agi slnga aliba lenten moapu ka nung Tsüngremi Ezekiel tiyong nung noktadaksü.

Terettemji takang, prokshir, jenti aliba sayu aser idangi Tsüngremi Ezekiel dang asüngdang, "Nisung chir, item teret taküm alitsü kokdi ma?" pai langzü, "O Kibuba, nai metet." |(t.3). Tsüngremi item teret dang shintsü Ezekiel nem nungloktsü. Kodang shin, terettemji kati ka meten bushia sentaktepa, shi adok aser tekep agi aji nembang. Saka tangula maka, ano Tsüngremi tangula asoshi shintsu pa den jembi. Kodang pai shin, Tsüngrem tangula ai aser item teret jagi nisung taküm küma sepai telok tulu ka noktak.

Tsüngremi Ezekiel dang, Israel nung Babelon tepuokdak aliba jenjangji sayu; shi nung taküm saka tanela nungbo teret takang ama tasü. Tanü asenok Khristan aika, teret lenten moapu nungji lir. Ezekiel dang Tsüngremi asüngdangba "Item teret taküm alitsü kokdi ma?" iba kasa tanü asenok dang Tsüngremi asüngdang. Asenoki langzütettsü, "O Kibuba, item teret ya ne tangula agi taküm alitsü akoker"

# Mel Gibson-i 'Passion of the Christ' film tasenba tangok tenzüksü



**January 07, 2023:** Film director nungtugu, Mel Gibson-i 2004 küm 'The Passion of the Christ' film sayaba sülen iba film kanga nungtugu aküm; pai maneni taküm kasa film tasenba tangok tenzüksü, ta osang ka ajanga metetdaksü. Bodhbarnü film journalist, Jordan Ruimy-i, "Taruba ita ishika tsüngda Mel Gibson-i The Passion of the Christ: Resurrection film tangok tenzüksü," ta metetdaksü. "Film tasenba nungjia Jim Caviezel-isa Yisu shilem agitsü," ta Ruimy-i metetdaksü.

"Iba ya mapang talangka nungi yongyaa liasü," ta pai ashi. Entertainment website IMBD.com-i 2024 küm sayatsü aliba film tasentem list sangdongogo.

2004 küm sayaba 'The Passion of the Christ' film ya Khristan film tem rongnung nungtuguba aküm aser 2004 küm hopta pezü tashi iba film ya box office nung temaba jenjang (No. 1) nung liasü. Iba film ajanga linük kija nunga dollar sen

million 370 dak tema aazük.

Passion of Christ film ya Yisu alima nung alidang Pa atema tatembangbuba anogotem nung atalokba otsü lir.

Kasa film tasenba yanglutsü atema küm ter tashi jembia aruogo, ta Ruimy-i metetdaksü.

"Gibson-i Braveheart film screenwriter Randall Wallace den külemi meranga inyakdar aser tang tashi nung otsü 'draft' trokben züluogo. "Passion of Christ; Resurrection" ya talisa

Yisu tou-ashiba aser anogo asem tsüngda Pa Kangki nung metaba mapang nungi Pa tasü nungi shia aruba tashi nung rangloker tangoktsü," ta Ruimy-i metetdaksü. Passion of the Christ film ajanga Oscar nominations asem- Cinematography, Original Score aser Makeup nomination ngua liasü.

Mel Gibson-i, 2004 küm sayaba film ya ajanga pai tanela tsütsü aika ajangshi, aser iba film yangludang Tsüngremi len aniba pai meteta liasü, ta ashi.

# Gorkha Baptist Church Council (AGBCN) mungdang tenzükgoko



**Kiphire, January 07 (TYO):** Hokolbar nikongdang Nepali Baptist Church (NBC), Kiphire nung Association of Gorkha Baptist Church Council (AGBCN) 15buba mongdang tenzükgoko.

Anogo asemnü mungdang omenji "Deeper walk with God" lir.

United Sangtam Baptist Lithroti Ashimükhong (USBLA) Executive Secretary, Rev. Y. Imtiba Sangtam, AGBCN Executive Secretary Rev. Dr Santabir Rai aser

ABCN Council Chairman, Robert Aley nungeri tekülem sentongtem nung jembitsü aser NBC Pfulsero pastor, Krishna Ramauli Bible study speaker asütsü.

Mungdang tetenziük sentong nung AGBCN Council Chairman-i AGBCN wako salatsü aser tetenziük sentong nung o jembirji Robert Aley liasü. NBC Kiphire pastor, Bhim Sapkota-i lokti pelaa agizükba o jembi aser Head GB Kiphire, Thongseli Sangtam-i tayongzükba o jembia liasü.

Kasa sentong nung NBC Kiphire-i lokti pelaa agizükba ken ka aten aser Gorkha Baptist Church Jessami & Thahekhu-i ken aten. Tongti o jembiri "Tsüngrem den jajaba ajanga ajak takoktsü" onük jembia liasü. Iba mungdang nung Nagaland, Manipur aser Assam nungi AGBCN nung affiliate süa aliba Nepali/Gorkha Arogo 35 nungi tejaoker 250 shi adener. Iba mungdang ya January 8 aonung tembangtsü.

AO OSHI ANGAZÜKDAK:

TANÜ ANGAZÜKTSÜBA OJANG

Ongkhu

(n) külem aoe, külemi mapa inyakertem (fellow workers)

\* Ozü ongkhu purtem küm tasen nung külemi chiyong.

Ongko

(n) züngyatem bendenba, intokba, lemsaba aser abenba (Mathematics)

\* Ongko nung ajungertem dang Science azünger.



Tir Yimyim

OLONG PAITEP # 6393

Grid for OLONG PAITEP # 6393 with numbers 1-17 in various positions.

TIPLIN

- 1. Nüji masü - (4)
3. Technütsüka - (6)
7. Aketa shirangba - (5)
8. Pi - (6)
9. Amena - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

LANGTSÜNGLEN

- 1. Jila tulu - (5)
2. Sarasademdang tembang - (4)
4. Tarutsü indang ashirtem - (6)
5. Alia - (5)
6. Mojing - (5)
9. Tai inyakba metet - (5)
10. Medemer hijiba - (6)
11. Tatokba / Amadok - (5)
12. Anüngdang masü - (5)
14. Jabaso masü - (4)

OLONG PAITEP # 6392 TELANGZÜBA

TIPLIN :

- 1. Zütsük, 3. Azü, 5. Omen, 6. Anak,
8. Lijaba, 11. Antsük, 14. Tanü,
15. Nati, 16. Ako, 17. Tzusen.

LANGTSÜNGLEN :

- 1. Zütsüra, 2. Sempa, 4. Zünga,
7. Tir, 9. Anüolen, 10. Zün,
12. Tenük, 13. Watsü.



ALOKBA CLASS NUNG :

- Miss : Alok, na tain kümer kechi asütsü?
Alokba : Ni tain kümer Sadi asütsü.
Miss : Masü, na tain kümer kechi kümner ta aja.
Alokba : Ni tain kümer kibong akümtsüa ta.
Miss : Masüaja, nai nütsü o nübu na yaritsü atema kechi bener arutsütsü?
Alokba : Kütsü o kübu na yaritsü atema ni kiyimla ka "Bahu" anir arutsüa ta.
Miss : Hauja aji shitaka, saka na kibong aotsü atemaji kechi inyaktsü?
Alokba : Ni ozü kibong aotsü atemaji kübutsüi kechi shidir aji angaa inyaktsü ati.
Miss : Oh Alokba!

Lilir : WhatsApp

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüng :
2. Tasoba anogo :
3. Küm : 4. Class :
5. School :
6. Talidak :
7. Salem osang :

Manipur nung telungpur telok balala züngsem 43 temai adok



Manipur chief minister N Biren Singh den Rajya Sabha MP Leishemba Sanajaoba council of ministers aser Manipur Director General of Police (DGP) nunger temai adokba telungpurtem den agiba noksa ka angur.

Imphal, January 7, 2023

(Agencies): Manipur ya telungpur maliba state ka kümogo ta Union Home Minister-i sangoktsüba sülen anogo ka lir telungpur telok balala nungi züngsem 43 temai adokogo.

Honibarnü 1st Manipur Rifles Banquet Hall, Imphal nung sentong ka nung parnok temai adok.

Iba sentong nung tongti tesemdangerji Manipur Chief Minister N Biren Singh liasü aser pai telungpur 43 pelashisia agizük.

Tanü temai adokba telungpurtem ya KYKL nungi 13, PLA/RPF nungi 5, KCP(N) nungi 5, KCP (PWG) nungi 11, UNLF nungi 5, PREPAK nungi 1, PREPAK (PRO) nungi 2 aser NSCN (U) züngsem 1 lir.

Parnok ajak camouflage uniforms agir aru aser parnoki arms 19, hand grenades 17, handheld sets 5, Kenwood set 1, PEK 9, IED 5 aser ammunitions 209 agütsü, ta CM Biren-i ashi.

Manipur home department-i ayongzükba 'homecoming ceremony' nung adenba sülen

Biren Singh-i telungpur ajak olemteptsü atema temai adoktsü ayongzük.

State sorkari temai adokba telungpurtem 'security and rehabilitation' indang mapa ajak inyaktsü ta paisa ashi.

Manipur chief minister N Biren Singh-i aniba BJP sorkar ajanga Manipur nung telungpur khuret agienogo ta Union home minister Ami Shah-i ashiba sülen anogo ka lir tanü iba sentong ayongzüka agi.

2022 nunga telungpur telok balala nungi züngsem 69 tashi temai adokogo.

Arishi küm 85 tain Bangladeshi refugee ka arem nung asü

Aizawl, January 7, 2023

(Agencies): Bangladesh nungi arishi küm 85 tain tambur ka Mizoram arrtsü anasa arem nung yatzüraba agi asü.

"Bangladesh Tribal Baptist Church nung pastor Sawmkhupa ya hopta ka jungnüa arem nung liasü" ta Parva village council president & Refugee organising committee chairman Gospel Hmangaihzuala-i ashi.

Tawa tu pa den tanga refugee tem Mizoram-i aru saka Border Security Force (BSF) sepaitemi parnok Simnasora yimtsüng nungi

meindok, ta Gospel-i ashi.

Yaküm November ita nungi Bangladesh nunger nisung 328 tashi Mizoram kübok Lawngtlai district nung jenoka lir.

Bangladesh Army aser Kuki-Chin National Army (KNA) tsüngda khatepba ajanga parnoki ki toktsür jena aruba liasü. KNA ya Bangladesh nung Kuki-Chin nunger atema state balaka meshia raraba telungpur telok ka lir.

Arishi küm 85 tain ka yatzüra asüba atema Central Young Mizo Association (CYMA)-i sasa bilemba metetdaksüogo.

"Iba tatalokba atema CYMA-i January 9 nü Aizawl nung aliba Raj Bhavan jakdang lungkak aitba sentong ka agitsü. Kuki-Chin nunger pusema nungitba sayua onoki lungkak aittsü" ta CYMA general secretary Prof. Lalnuntluanga-i ashi.

Brihostibarnü CYMA executive committee senden ka amendang Centre dang humanitarian ground nung Kuki-Chin refugee tem yaritsü atema tayongzükba agütsüogo.

Bangladesh nung Kuki-Chin nunger ya Mizo nunger sentaktepa lir.

Tripura nung mini tea factory tasen ka lapoktsü



Agartala, January 7, 2023

(Agencies): Tripura Tea Development Corporation (TTDC) indang manufacturing units ana lir. Iba dak alia onoki ano ka lapoktsü. Asüng Machmara nung lung azüngba sentong agitsü. Kü den Industry minister Santana Chakma aser Labour minister Bhagaban Chandra Das na iba sentong nung shilem agitsü" ta pai ashi.

Iba ya North district kübok Machmara tea estate nung lir.

"TTDC-i süngojok talila yanglutsü atema tea factory ano ka lapoktsü" ta TTDC chairman Santosh Saha-i ashi.

"Tang Tripura Tea

Development Corporation (TTDC) indang manufacturing units ana lir. Iba dak alia onoki ano ka lapoktsü. Asüng Machmara nung lung azüngba sentong agitsü. Kü den Industry minister Santana Chakma aser Labour minister Bhagaban Chandra Das na iba sentong nung shilem agitsü" ta pai ashi.

"Iba factory yangludang Rs 3 crore shi endoktsü aser lapokba sülen süngojok seret

lakh 1 shi yanglutsü akok. Taoba mapang onoki Manu valley tea company dang süngojok tou ayok saka factory tasen lapokba sülen parnok dang mayoktsü aser süngolu ayimertem ajangzüktsü" ta Saha-isa ashi.

Tripura nung Tribal Welfare Department-ia iba factory tasen lapoktsü atema Rs 1 crore lemsüktsüogo aser tanüngba senji tanga lenmangtem ajanga bushiteptsü ta paisa ashi.

"North district nung gas mangur anungji iba factory nung nagmati amshitsü. Nübertemi Tripura süngo kanga sapor aser iba jagi factory tasen lapoker" ta TTDC chairman Santosh Saha-isa metetdaksü.

TTDC indang estates 5 aser manufacturing units 2 lir aser item ajanga küm nung süngojok seret lakh 90 yanglur.

# Myanmar military-i election atema telungpurtem den sensak asem



January 4 nü Myanmar nüjiso anguba benjung linük yimtiba Naypyidaw nung amungba mapang Myanmar military nung tetsür sepaitem tangokba noksa nung angur.

**Yangon, Aenjeti/January 7 (Agencies):** Myanmar nung military sorkari telungpur telok asem den parnoki aziüoka aliba tesemtem nung election agitsü atema sensak semogo, ta telok ka nungi otongdar kati ashi.

Shan State Progress Party (SSPP), United Wa State Party (UWSP) aser National Democratic Alliance Army nungi lenirtem tang linük yimtiba Naypyidaw nung anogo asem atema sensaksemdar, ta state media sangdong ka ajanga Hokolbarnü metetdaksü. 2021 küm February ita military-i sorkar atsüంగా sülen linük nung mepetmesü tulu adokba nung iba telok asem yagi shilem magi pila liasü.

SSPP telok, shirnoki northern Shan state amokbanga lir, iba telok nung otongdar kati ashiba agi, "military-i onok dang onoki aziüoka aliba tesemtem nung election tetsükdaksü kecha makai ochi shia agidaksütsü asüngdangogo."

"Onoki election anema menokdaksü," ta otongdar-i Agence France-Presse dang ashi.

State meyong Global New Light of Myanmar-ia, ethnic lenirtem aser military lenirtem tsüngda senden amenba indang metetdaksüogo.

UWSP military arm, United

Wa State Army (UWSA) kübok sepai 25,000 shi lir aser parnok ya alima nung non-state military tulutiba rongnung ka lir. UWSA-i parnoki aziüoka aliba tesem nung kibong shia nungi züngsem kaka parnok indang military force nung anioker aser iba ajanga parnok nütsüng aika akümer. Iba telok yagi Myanmar kübok anütoktiplen China den arrtsü nung aliba tesemtem amokbanger lir.

Myanmar military-i taoba ita telungpur telok tilala pongu den sensaksemogo. Sensakmsemba sülen item teloktem yagi külem sangdong ka ajanga military-i election agitsü atema sentong aliba pusemba sangdongogo.

Myanmar nung ethnic rebel armies 20 shi lir, shirnok kati ka den aser linük military den küm aika raratepa arudar. Item teloktem ya nüjiso meshiba den temesepba mozü shibelenba lenmang aziüoksü aser alirongsen aziüoksü atema rara arudar.

Bodhbarnü Myanmar nüjiso anogoba anogo o jembiba mapang linük military lenir Senior General Min Aung Hlaing-i, election agitsü sentong aliba indang jembiba, ajisüaka pai election kodang agitsü iba indang osang tejangja magütsü.

General election ayongzüka agitsü sentong aliba ya ballot box ajanga military-i sorkar

atsüంగా süngjemshidaksütsü merandangba ka aser general temi maneni linük yimsüsü asütsü atema ozüng kübok medendaksütsü asoshi merandangba ka ta angateter. Military-i election inyakyim ajunga aziüoksü aser parnoki taoba küm ana tashi parnok anema nokdaksüpurtem inyaksagshi mesükdaksütsü atema jenjang agia arudar.

2021 küm February ita military-i sorkar atsüంగా sülen Myanmar tanaben military yimsüsüba küboki ai. Sorkar atsüంగా sülen military-i nüburtemi shimba lenir Aung San Suu Kyi densema nisung meyirejang aika puogo. La tang military-i sota lir aser ken o balala nung aija küm 33 tepuokdak ayutsü atema obendang agütsür lir.

La pusemertem aser independent analysts temi ashiba agi, Aung San Suu Kyi anema benokba ken o tem ya la tenüng menüksütsü aser election nung shilem magidaksütsü atema inyaksangshiba lir.

Military-i parnoki sorkar atsüంగా ya taoba election nung ochi mashi inyakyim aika aliba ajanga lir ta shiogo, ajisüaka independent election observer temi inyakyim nung aibelen aliba kecha monguteti liasü.

# MENUNGRA BILEMTETER

**LT. Mr. IMLITEMSU (WAROMUNG)**

09.04.1988 - 08.01.2022

Nai onok toktsür küm ka ajungba anogo nung na akümüli nung alidang nü temeim aser nü mapa tajungtem bilemteta Tsüngrem nem tenüngsang aser nü nem tetushi agüja amonger.

~ Temeim kinungtsü aser kinungertem.



Round 14 tashi vote agiba tamakok anguba sülen Honibarnü Republican Kevin McCarthy US House of Representatives Speaker asütsü shimogo. McCarthy-i election ya vote 216-212 agi koka liasü.

# Iran nung ano nisung ana tasüba agi merenshi

**Tehran, Aenjeti/January 7 (Agencies):**

Taoba küm Hadis Najafi police ket nung lia asüba ajanga rongmesoba longkak aitba sentong nung paramilitary Basij force ka tepsetba atema aitsür alir nisung ana Iran-i tasüba agi merenshiogo.

Mohammad Mehdi Karami aser Mohammad Hosseini na Honibar anepdang aletseta südaksüogo. Linük Supreme Court-i tena tasüba agi merenshitsü atema obendang agütsüba sülen Honibarnü tepsetogo, ta judiciary official news outlet sangdong ka ajanga metetdaksü.

Najafi sür anogo 40buba nung November 3 nü Tehran anasa Karaj yimti nung longkak aitba mapang Ruhollah Ajamian tepsetba atema Karami aser Hosseini na aija liasü.

Iba anogo social media nung prokshiba video nung nüburtemi highway tongtibang nokdang aliba aser Basij uniform ka semer Ajamian ali nung marakzüi aliba sayuogo.

Judiciary-i ashiba agi, iba ken o dak sendakba nung nisung 16 puogo aser Karami aser Hosseini na ya temulung melemi bilemertem rongnung tongtiba liasü

Judiciary-isa, parnok court session indang clip ka lemsatepogo, kong Karami-i pai Ajamian dak long ka shia arua teploksü ta ashi aser Hosseini-i, pai pa dak kotari agi aiben atsü, ta nangzüka nguogo.

Judiciary-isa, clips tem sayuogo aser ashiba agi, item clip tem ya tenati Ajamian tepsetba mapang tangokba lir.

Parnokisa Hosseini ya teka alener mena aliba aser pa jakdang pa meyong kotari balala yutsür tangokba noksa lemsatepogo.

Honibarnü nisung ana tepsetba sülen iba longkak aitba ken o dak sendakba nung nisung pezübuba tepsetogo.

Online nung prokshiba audio clip ka nung arishi küm 22 tain Karami tebuti par jabasoi kecha aibelen masü ta ashiba angshio. Judiciary-i ya magizük aser Ajamian tepsetba ken o nung tenük kuli agütsürtem nangzüka video tem lemsatepa liasü.

Iba ken o dak sendakba nung Supreme Court-i, tangar nisung asemi temepishiba benokba agizükogo. Ajisüaka tanga ken o nung tasüba agi merenshitsü atema obendang agütsüba maneni pusemogo, aser Amnesty International-i ano nisung aika tasüba agi merenshitsü akok ta tekümdangtsü metetdaksüogo.

December ita longkak aitba dak sendakba nung Mohsen Shekari, 23, aser Majidreza Rahnavard na tasüba agi merenshiogo. Majidreza Rahnavard ya Mashhad nung yimjak nung aletseta südaksü. Tena ya Tsüngrem anema nokdakba atema aija liasü.


Iran nung arishi küm 22 tain Mahsa Amini morality police-i pua aliba mapang asüba sülen longkak ait tenzü.

Bendanglen amendaker aliba human rights organization temi ashiba agi, iba mepetmesü tenzüker nisung 500 dak tema süogo.



S Capitol amakba sülen küm ana lir US tir Joe Biden-i Hokolbarnü, Donald Trump pusemertem nokdangba police tem nem aküm tetushi agütsüba mapang, America nung yimden yimsüsüba tsütsü azütokshiba magizüktsü, ta ashi.

## Messi nem L'Equipe-i athlete of the year naroküm agütsü



Lionel Messi

**Aenjeti/January 7, 2022 (Agencies):** French publication L'Equipe-i kum nung asayar tajungtiba nem agütsüba 'Champions of Champions' award Lionel Messi nem agütsüogo. Messi lenisüba nung Argentina team-i taküm World Cup akoba sülen pa nem iba naroküm agüja liasü.

Iba naroküm atema magazine indang staff temi vote agütsür. Iba Naroküm ya 1964 kum nungi agütsür aser 175 kum nungi tenzüka bendanger asayartem nema agüja arudar.

Saka asayar tajungtiba shimba inyakyim ajanga team asaya nung asayaba asayartem atema iba naroküm angütsü kanga tasak kümdaktsür. Ajisüaka taküm top 2 asayar anaprongla football asaya nungi liasü.

Messi-i point 808 nguteta iba naroküm angu aser Paris Saint-Germain nung külem teammate Kylian Mbappé-i point 285 nguteta tanabuba jenjang nung liasü. Top 5 nung tennis asaya Rafael Nadal, cyclist Remco Evenepoel Formula One champion Max Verstappen nung

densema liasü.

L'Equipe-i iba naroküm ya football asayartem nem aibenbo magütsür aser tatemsa football asayartem rongnungi 2011 kum Lionel Messi-i iba naroküm agizüka liasü. Barcelona puri asayamung tongtibang asemprongla akokba sülen pa nem iba naroküm agütsü aser football asayartem rongnungi pa kijai iba naroküm anaben ngua lir.

Messi den külemi football asayartem rongnungi Diego Maradona (1986), Paolo Rossi (1982), Romario (1994), aser Zinedine Zidane (1998) nungeri iba naroküm agizükogo. Parnok ajak yagi World Cup akokba sülen iba naroküm agizüka liasü.

Tawa tennis asayartem iba naroküm timba agizüka lir. Taoba kum Novak Djokovic-i iba naroküm agizük, Roger Federer aser Rafael Nadal nati pezübenben aser Serena Williams-i asemenben agizüka lir. Track and field athletes aser Formula One drivers temia iba naroküm aiben agizükogo. Parnok rongnungi Michael Schumacher aser Simone Biles nati asemenbenben aser Usain Bolt-i ponguben tashi iba naroküm agizüka otsü tasen yanglur lir.

## AFI-i Asian Athletics Championships atema asayar sangdongogo

**New Delhi, Aenjeti/January 7 (Agencies):** Athletics Federation of India (AFI)-i Honibarnü 10buba Asian Indoor Athletics Championships nung asayatsü atema asayar 26 agi kümtetba Indian continent sangdongogo.

Iba asayamung ya Astana, Kazakhstan nung February 10 nungi 12 tashi asayatsü.

India team nung tebur 13 aser tetsür 13 densema lir, kong Tokyo 2020 Olympian Tajinderpal Singh Toor aser tetsürtem rongnungi 100m hurdles nung national record bena alila, Jyothi Yarraji nunger densema lir.

"Asayartem ya 36buba National Games aser National

Open Athletics Championship 2022 nung shilem agiba dak ajemdaker shimogo aser iba asayamung nung parnoki takok tajung angütsü imlar," ta AFI tir Adille Sumariwalla-i ashi.

Iba asayamung tesüsabuba nung India team-i medal 6 ngua liasü. Parnoki silver pezü aser bronze medal ana ngua liasü.

Asayartem yamai alitsü: (Tebur): Elakiya Dasan (60m), Amlan Borgohain (60m), Tejas Shirse (60m hurdles), Sarvesh Anil Kushare (High Jump), Aromal T (High Jump), Siva Subramaniam (Pole Vault), Prashant Singh Kanahiya (Pole Vault), Jeswin Aldrin (Long Jump), Muhammed


Anees Yahiya (Long Jump), Praveen Chithravel (Triple Jump), Arun AB (Triple Jump), Tajinderpal Singh Toor (Shot Put), Karanveer Singh (Shot Put)

(tetsür): Jyothi Yarraji (60m & 60m hurdles), Archana Suseentran (60m), Sapna Kumari (60m hurdles), Abhinaya Shetty (High Jump), Rosy Meena Paulraj (Pole Vault), Pavithra Venkatesh (Pole Vault), Shaili Singh (Long Jump), Nayana James (Long Jump), Sheena NV (Triple Jump), Poorva Hitesh Sawant (Triple Jump), Abha Khatua (Shot Put), Swapna Barman (Pentathlon), Sowmiya Murugan (Pentathlon).

## Carlos Alcaraz Australian Open nung masayatetsü

**Aenjeti/January 7, 2022 (Agencies):** Teburtem rongnung World number one asayar Carlos Alcaraz Australian Open nung masayatetsü. Pa pre-season training mapa tetsüing tachichilen yiruba sülen iba asayamung nung magitetsüsa kumogo ta Spain nunger asayar yagi Hokolbarnü metetdaksü.

"Ni preseason kanga junga asaya aliba mapang training nung marakzütüsü yim agi arakzüba sülen yiruogo. Ni tetsüing tachichilen semimembranosus muscle yirua liasü," ta pai Twitter nung zülutsü.



Carlos Alcaraz

"Ni Australia nung tajungtiba asayatetsü atema kanga meranga inyakogo, saka ni Care A2+ Kooyong mesüra Australian Open nung masayatetsü. iba jenjang agütsü

ya kanga tasak saka ni takaratiba nung anepa maneni asayatsü imla atar. 2024 kum ajurutepti," ta pai shisem.

Arishi kum 19 tain asayar yagi taoba kum U.S Open koka liasü aser teburtem rongnungi world number one jenjang tonga asayaba asayartem rongnung tanobusang aküm.

Paris Masters nung yiruba ajanga ATP Finals aser Davis Cup nung masayatetba sülen taküm kum atema mezüngbuba Grand Slam metenzük tsüingda pai, pa temang kanga tajungba kumogo, ta shir liasü, saka pa tanaben yiruogo.

## BCCI-i selection committee tasenba shimba sangdongogo

**New Delhi, Aenjeti/January 7 (Agencies):** Cricket Advisory Committee (CAC)-i Honibarnü Senior Men's National Selection Committee atema Chetan Sharma, Shiv Sundar Das, Subroto Banerjee, Salil Ankola aser Sridharan Sharath nunger tenüng benokogo.

Committee-isa, senior men's selection committee mendenbuba mapa abentsü atema Chetan Sharma indang tenüng agüja liasü.

"Cricket Advisory Committee (CAC) nung Ms Sulakshana Naik, Mr Ashok Malhotra, aser Mr Jatin Paranjape nungeri All-India Senior Selection Committee züngsemtem shimtsü atema inyakyim benoka inyaka liasü. 2022 kum November 18 nü BCCI indang official website nung mapa pongu atema advertisement agütsüba sülen board-i application 600 shi agizka liasü," ta BCCI sangdong ka

ajanga metetdaksü.

"Application tem kanga junga asadanga sülen CAC-i jurila interview agütsü atema nisung 11 shima liasü. Interview dak ajemdaker committee-i Senior Men's National Selection Committee atema item nisungtem tenüng benokogo," ta BCCI-sai metetdaksü.

November 18 nü BCCI-i, Chetan Sharma-i anir inyaksangshiba All India Selection Committee nung züngsemtem ajak mapa nungi anenja liasü. T20 World Cup nung India team tsükba sülen iba jenjang agia liasü. Sharma shiba taoba mapang India team nungi asaya liasü, pa 2020 kum December ita Chief Selector mapa asoshi shima liasü.

BCCI-isa, National Selector mapa atema application tem jaok aser iba mapa asoshi kechisa nüngdaker item indang metetdakja liasü.

## France head coach Deschamps den tenangzüktepba yanglushi



Didier Deschamps

**Aenjeti/January 7, 2023 (Agencies):** France head coach Didier Deschamps den tenangzüktepba tasen ka yangluogo aser pai 2026 kum June ita tashi iba mapa abentsü, ta French football federation (FFF)-i Honibarnü sangdong ka ajanga metetdaksü.

"2026 km June ita tashi French national team head coach mapa abentsü asoshi Didier Deschamps' den tenangzüktepba tasen yanglushiba French Football Federation aser Noel Le Graet aser tir-i kanga pelashishia sangdonger," ta kasa sangdong nung shia lir.

Deschamps indang taoba contract ya 2022 kum World

Cup sülen tembangogo, kong final nung France puri penalty metsütepba sülen Argentina mekoki liasü.

Deschamps lenisüba nung France team-i 2018 kum Russia nung World Cup ako aser 2021 kum Nations League kokogo. Parnok 2016 kuma European Championship final tonga asayaogo.

France pur tang FIFA world rankings nung Brazil aser Argentina na sülen tasembuba jenjang nung lir.

FFF-i ashiba agi, Deschamps indang assistant coach Guy Stephan, goalkeeping coach Franck Raviot aser physical trainer Cyril Moine nungera maneni national team nung inyaksü.

## BILEMDANGANG

"Metongshitsü arütsübaji taküm lenmang lir."